



Broj: 10-05-1373/16  
Sarajevo, 09.03.2016. godine

**SKUPŠTINA KANTONA SARAJEVO**  
**-Služba za skupštinske poslove-**

**PREDMET : Odgovor na poslaničko pitanje**

Zastupnica Bibija Kerla je, na 11. Radnoj sjednici Skupštine Kantona Sarajevo, održanoj dana 01.02.2016. godine, u okviru tačke Dnevnog reda "Zastupnička pitanja, inicijative i odgovori", postavila zastupničko pitanje:

„1. VD Predsjednik UO Zavoda za medicinu rada KS Jasmin Kreso (nezaposleni pravnik, 46 godina, SBB, bezrazložno agresivnim i nepristojnim ponašanjem ugrožava rad Zavoda. Sjednice su pretvorene u poligon za neobjašnjive prijetnje u kome VD Predsjednik rijetko kome daje riječ, dnevni red sam određuje bez dogovora sa direktoricom i sekretarom Zavoda, sadržaj sjednice je većinom besmislen a traju po par sati.

Ministrica zdravstva g. Ademaj je pismenim putem obavještena da on ugrožava rad Zavoda (do sada je poslovanje bilo više nego uspješno) sekretar Zavoda je jedini pravnik i jedina osoba u Zavodu zadužena za javne nabavke a sada je samo u funkciji ispunjenja bezbrojnih zahtjeva VD Predsjednika iz samo njemu poznatih razloga, mobinguje sekretara Zavoda i direktoricu pošto VD Predsjednik nije dozvolio da se u komisiju za izbor direktora poštuje stručna i nacionalna pripadnost i sam odredio članove komisije: član upravnog odbora zavoda i pravnik iz Ministarstva zdravstva. Otišla je prijava prema Ombudsmenu o čemu je obaviještena Ministrica K.S. nikada se nije oglasila niti je htjela da primi na razgovor VD direktoricu Zavoda i Sekretara Zavoda.

Pitanje Ministrici zbog čega dopušta gore imenovanom da radi to što radi?

U vezi sa postavljenim poslaničkim pitanjima dostavljamo slijedeći:

**ODGOVOR**

Ministrica zdravstva Kantona Sarajevo, gđa. Zilha Ademaj, dipl. oec. je, u vezi sa naprijed navedenim, posjetila JU Zavod za medicinu rada Kantona Sarajevo, te prisustvovala i jednoj sjednici Upravnog odbora Zavoda i tom prilikom je upoznala predsjednika i članove Upravnog odbora, v.d. direktoricu Zavoda, kao i Sekretara Zavoda da određeni problemi koji su se pojavili u komunikaciji između Upravnog odbora Zavoda i menadžmenta Zavoda obostrano, moraju biti što prije prevaziđeni a međusobni odnosi harmonizirani, te da svi kod obavljanja poslova iz svoje nadležnosti moraju poštovati važeće zakonske i podzakonske akte. Također, Ministrica je naglasila da i Upravni odbor i menadžment Zavoda moraju obavljati povjerene im poslove u interesu JU Zavod za medicinu rada Kantona Sarajevo.

Takođe, Ministarstvu zdravstva Kantona Sarajevo je dana 13.01.2016. godine, dostavljen akt JU Zavod za medicinu rada Kantona Sarajevo, broj: 02-15-3/16 od 13.01.2016. godine, potpisan od strane v.d. predsjednika Upravnog odbora ove ustanove, gosp. Jasmina Krese. Navedenim aktom se traži od Ministrice zdravstva Kantona Sarajevo da imenuje jednog predstavnika Ministarstva

zdravstva Kantona Sarajevo, kao člana Komisije za provođenje postupka za izbor direktora JU Zavod za medicinu rada Kantona Sarajevo, što je prije moguće.

Kao resorno ministarstvo u čijoj je nadležnosti JU Zavod za medicinu rada Kantona Sarajevo, Ministarstvo zdravstva Kantona Sarajevo je upoznato sa činjenicom da je u navedenom zavodu imenovana v.d. direktorica i to treći put v.d. mandat, te da joj je i treći mandat istekao početkom mjeseca marta ove godine. Obzirom da se v.d. mandat ne može produžavati, te da se ne bi došlo u situaciju da ustanova ostane bez direktora, potrebno je provesti postupak izbora direktora ove ustanove na mandatni period od četiri godine.

Iz naprijed navedenih razloga Ministarstvo zdravstva Kantona Sarajevo je aktom broj: 10-37-SI/16 od 14.01.2016. godine, koji je dana 18.01.2016. godine proslijeđen Upravnom odboru JU Zavod za medicinu rada Kantona Sarajevo, obavijestilo isti, da se ispred Ministarstva zdravstva Kantona Sarajevo, u Komisiju za provođenje postupka za izbor direktora JU Zavod za medicinu rada Kantona Sarajevo, predlaže Alen Katović, dipl. pravnik, uposlenik ovog ministarstva.

Članom 33. st. (1) i (2) Statuta JU Zavod za medicinu rada Kantona Sarajevo („Službene novine Kantona Sarajevo“, br. 45/13 i 47/13) je propisano da javni oglas za direktora Zavoda raspisuje Upravni odbor, te da proceduru javnog oglasa, provodi Komisija koju imenuje Upravni odbor. Navedenom statutarnom odredbom nije propisana struktura navedene komisije, odnosno koji i čiji predstavnici treba da čine komisiju, koje stručne kvalifikacije treba da imaju članovi komisije, kao ni broj članova komisije, ali Ministarstvo zdravstva Kantona Sarajevo je mišljenja da je poželjno da sastav komisije čine najmanje 1 ljekar, 1 diplomirani ekonomista i 1 diplomirani pravnik, obzirom da se radi o izboru direktora odnosno menadžera koji u opisu svoje funkcije treba da poznaje i oblast pravnih i finansijskih poslova, pored medicinskih poslova i organizacije rada koje čine osnovnu djelatnost ustanove. Obzirom na naprijed navedeno, te da je u isključivoj nadležnosti Upravnog odbora JU Zavod za medicinu rada Kantona Sarajevo, imenovanje navedene komisije, Upravni odbor je Odlukom broj: 02-15-3/16 od 19.01.2016. godine, imenovao Komisiju za provođenje postupka za izbor direktora JU Zavod za medicinu rada Kantona Sarajevo, poštujući gore navedeni princip Ministarstva, odnosno u Komisiju su imenovani: 1 ljekar spec. medicine rada iz JU Zavod za medicinu rada Kantona Sarajevo, 1 diplomirani ekonomista i 1 diplomirani pravnik.

Mandat navedene Komisije je da pripremi tekst javnog oglasa za izbor direktora, pregleda pristigle prijave, utvrdi njihovu blagovremenost i potpunost, obavi intervju sa kandidatima i predloži Upravnom odboru Zavoda listu kandidata za direktora, u čijoj je nadležnosti imenovanje direktora JU Zavod za medicinu rada Kantona Sarajevo.

Ističemo također, da je u dosadašnjoj praksi u komisijama za izbor direktora zdravstvenih ustanova Ministarstvo zdravstva Kantona Sarajevo, kao resorno ministarstvo i predstavnik Osnivača javnih zdravstvenih ustanova, imenovalo svoga predstavnika obzirom na nadležnosti Ministarstva odnosno Osnivača u pogledu rada i poslovanja zdravstvenih ustanova.

Shodno naprijed navedenom, smatramo da je procedura imenovanja Komisije za provođenje postupka za izbor direktora JU Zavod za medicinu rada Kantona Sarajevo, od strane Upravnog odbora JU Zavod za hitnu medicinsku pomoć Kantona Sarajevo, provedena je u skladu sa važećim propisima koji regulišu ovu oblast.

Ministarstvo zdravstva Kantona Sarajevo je, također, u vezi naprijed navedenog, zaprimilo i akt Institucije Ombudsmena/Ombudsmana, na koji je ovo ministarstvo uredno dostavilo izjašnjenje.

MINISTRICA  
*Zilha Ademaj*  
Zilha Ademaj, dipl. oec



web: <http://mz.ks.gov.ba>  
e-mail: [minzdrav@ks.gov.ba](mailto:minzdrav@ks.gov.ba)  
Tel: + 387 (0) 33 562-104, Fax: + 387 (0) 33 562-243  
Sarajevo, Reisa Džemaludina Čauševića 1

